



tešanjski BILTEN

Interno informativno glasilo, Godina XVI, septembar 2011. Broj 50



U ovom broju:

Rebalans Budžeta

**Općina Tešanj dobitnik
Plakete za očuvanje
kulturno-historijskog
naslijeđa**

Obilježen 9. septembar


DELTER projekat

Aktivnosti privrednika

II Etno festival

Mladi

septembar/rujan 2011.



tešanjski BILTEN

Interno informativno glasilo Općine Tešanj

Izdaje
OPĆINA TEŠANJ

Redakcija

Edina Kadušić, Ferid Mustafić, Suad Huskić,
Kanita Gredelj i Bahrudin Nočić

Glavni i odgovorni urednik

Edina Kadušić

Adresa Redakcije

Općina Tešanj, trg Alije Izetbegovica 11, 74260 Tešanj
Telefoni 032/650-341 i 032/650-022 (lokal 107),

Fax 032/650-220

E-mail press@opcina-tesanj.ba

Tiraž 2.000

Štampa

"Papir karton" d.o.o. Tuzla



IZMJENE I DOPUNE BUDŽETA OPĆINE TEŠANJ ZA 2011. GODINU

Na 32. sjednici Općinskog vijeća Tešanj koja je održana 20.9.2011. godine usvojene su Izmjene i dopune Budžeta Općine Tešanj za 2011. godinu. Ovim Izmjenama i dopunama Budžet je povećan za 11,71%, odnosno 1.130.000,00 KM, tako da sada iznosi 11.201.000,00 KM.

Pored činjenice dobre realizacije poreznih i neporeznih prihoda Budžeta na nešto većem nivou od planiranog, osnovni razlozi za donošenje izmjena i dopuna Budžeta bili su sljedeći:

- iskazivanje u Budžetu izdvojenih sredstava za realizaciju prenesenih projekata iz prethodne godine u visini od 482.800,00 KM na prihodovnoj i rashodovnoj strani,
- realizacija podrške viših nivoa putem dodjele grantova Općini umjesto direktnog plaćanja izvođačima radova,
- povećanje grantova koji se uobičajeno doznacavaju u budžet sa viših nivoa vlasti,
- obezbjeđenje sufinansiranja za projektnu fazu prikupljanja i prečišćavanja otpadnih voda od strane Fonda za zaštitu okoliša Federacije BiH, čime je prestala potreba za kreditnim zaduženjem u ovoj fazi realizacije Projekta,
- brisanje ranije planiranog kreditnog zaduženja i
- utrošak sredstava budžetske rezerve izdvojene po staroj zakonskoj regulativi, čija obaveza izdvajanja je prestala.

Ovako iskazana dodatna sredstva su raspoređena onako kako je to odlukama viših nivoa vlasti predviđeno, kao i općinsko učešće na nekim projektima, uz izdvajanje dodatnih sredstava za uređenje platoa "Musala" i prednje fasade objekata Opće biblioteka i dvorana.



I na rashodovnoj strani Budžeta uključena su sredstva prenesena iz prethodnih godina za realizaciju ranije ugovorenih projekata prema članu 2. Izvještaja o izvršenju Budžeta Općine za 2010. godinu.


Preostala sredstva se uglavnom raspoređuje na podršku projektima viših nivoa.

Ovim rebalansom nisu uvećani troškovi administracije, nego je samo izvršena određena preraspodjela unutar ranije odobrenog budžeta.

Struktura rashoda i izdataka za 2011. godinu nakon izvršenih izmjena i dopuna budžeta izgleda ovako:

R. br.	Vrsta rashoda i izdataka	BUDŽET ZA 2011. godinu	Procent /suma	REBALANS ZA 2011. godinu	Procent /suma
1	2	3	4	5	6
1	Sredstva za plate i naknade	2.220.000,00	22,06%	2.187.000,00	19,53%
2.a	Direktni materijalni rashodi organa uprave	777.500,00	7,73%	788.700,00	7,04%
2.b	Ostale usluge za opštredruštvene potrebe	1.375.000,00	13,66%	1.395.000,00	12,45%
3	Tekući grantovi (transferi), kamate i sredstva rezervi	3.335.500,00	33,15%	3.450.500,00	30,81%
4	Kapitalni grantovi (transferi) i izdaci	2.355.000,00	23,40%	3.379.800,00	30,17%
	UKUPNO	10.063.000,00	100,00%	11.201.000,00	100,00%

STRUKTURARASHODA I IZDATAKA U 2010. GODINI



- 1 - Sredstva za plate i naknade **23,45%**
- 2.a - Direktni materijalni rashodi organa uprave **8,19%**
- 2.b - Ostale usluge za opštredruštvene potrebe **15,57%**
- 3 - Tekući grantovi (transferi), kamate i sredstva rezervi **29,30%**
- 4 - Kapitalni grantovi (transferi) i izdaci **23,48%**

OPĆINA TEŠANJ DOBITNIK POVELJE ZA OČUVANJE KULTURNO-HISTORIJSKOG NASLIJEĐA

U okviru manifestacije *Dani europskog naslijeđa 2011*, koja je ove godine održana u Tešnju, dodijelje-



ne su Povelje Federalnog ministarstva kulture i sporta za doprinos u očuvanju i obnovi kulturno-historijskog naslijeđa Bosne i Hercegovine. Povelje su uručene Amri Hadžimuhamedović i Željku Pekoviću,

zatim pomoćniku općinskog načelnika Općine Tešanj Suadu Huskiću, Općini Tešanj, Župi sv. Mihovila Arkandela iz Vareša, Turističkoj zajednici Zeničko-dobojskog kantona, kao i Konzervatorsko-restauratorsko-preparatorskoj službi Zemaljskog muzeja BiH.

U ime Općine Tešanj, Povelju je primio Općinski načelnik Fuad Šišić, koji je u svom obraćanju naglasio važnost kulturno-historijskog naslijeđa za našu općinu, ali i za ljude koji ovdje žive.

Ovom prilikom, Općinski načelnik uručio je prigodan poklon u znak dobre saradnje Federalnom ministru kulture i sporta Salmiru Kaplanu i direktorici Zavoda za zaštitu spomenika Lidiji Mičić.



II ETNO FESTIVAL TEŠANJ 2011



U subotu 3. septembra u 11 sati na Čaršiji u Tešnju otvoren je *II Etno festival Tešanj 2011*. Na Etno festivalu izlagalo je 20-ak izlagača, uglavnom iz Tešnja.

Kroz upoznavanje vlastitih vrijednosti otvaramo mogućnost da to i drugi vide. Cilj nam je da ovaj festival preraste u tradicionalni, kazao je predsjednik Udruženja Sehara Miralem Alić, koja je ujedno i organizator festivala.

Također, prigodnim govorom, prisutnim su se obratili i direktor Agencije za razvoj TRA Hilmo Perčo i projekt menadžer Udruženja Sehara Almir Ramić.

Lokalna zajednica neguje kulturno naslijeđe, na šta smo veoma ponosni, kazao je Općinski načelnik Fuad Šišić, koji je festival proglasio otvorenim.

FEDERALNI MINISTAR SALMIR KAPLAN POSJETIO OPĆINU TEŠANJ

Federalni ministar kulture i sporta Salmir Kaplan, direktorica Zavoda za zaštitu spomenika Lidija Mičić, Kantonalna ministrica obrazovanja, nauke, kulture i sporta ZDK Bernadeta Galijašević posjetili su općinu Tešanj i Općinskog načelnika Fuada Šišića.

Ovom prilikom, Općinski načelnik delegaciji je predstavio općinu Tešanj, trenutne aktivnosti i planove za naredni period.


Nakon sastanka u Općini Tešanj, delegacija je obišla gradilište *Musala*, gdje je smještena i zgrada buduće Biblioteke.



PRVI SEKRETAR KINESKE AMBASADE U POSJETI TEŠNJU

Općinski načelnik Fuad Šišić i savjetnik Općinskog načelnika za pristup EU fondovima dr. Ismar Alagić održali su sastanak sa Prvim sekretarom Ambasade Narodne Republike Kine u Bosni i Hercegovini Yang Chunminom.

Tokom sastanka razgovarano je o mogućnostima privredne saradnje i mogućnostima ulaganja kineskih preduzeća na područje općine Tešanj. Nakon predstavljanja općine Tešanj, Općinski načelnik je prezentirao industrijske zone Vila i Glinište, kao i mogućnosti za potencijalne investitore.



ODOBREN PROJEKT DELTER ZA OPĆINU TEŠANJ

Općina Tešanj je jedna od devet općina u BiH kojoj je odobren grant iz projekta DELTER (Support to meet the requirements of the Energy Community Treaty for SEE focusing on EE & RE). Cilj projekta općine Tešanj je podizanje energetske efikasnosti u zgradi općinske uprave kroz zamjenu starih prozora i ugradnju ultrazvučnih mjerača toplotne energije i prateće opreme. Time bi se općina Tešanj svrstala u red lidera u BiH po pitanju podizanja energetske efikasnosti i redukcije gubitaka energije u objektu administrativne zgrade. Na pripremi aplikacije i vođenju procesa aktivno su radili doc. dr. Ismar Alagić, savjetnik Općinskog načelnika kao Vođa projekta i saradnici iz TRA Agencije za razvoj općine Tešanj.

U pripremi aplikacije i dostavi potrebnih informacija za predmetni projekat pružena je velikodušna podrška JP Toplana Tešanj i ostalih JU i JP u općini Tešanj, pa im se ovom prilikom iskreno zahvaljujemo na tome.

septembar/rujan 2011.

9. SEPTEMBAR - DAN OSLOBOĐENJA OPĆINE TEŠANJ OD FAŠIZMA

PRIJEM DELEGACIJE SUBNOR-a

Povodom općinskog praznika 9. septembra - Dana oslobođenja općine Tešanj od fašizma, Općinski načelnik Fuad Šišić sa saradnicima i predsjedavajući Općinskog vijeća Esmir Subašić upriličili su prijem za pet pripadnika SUBNOR-a (Ahmet Skopljak, Omer Hajrić, Knežević Marijan, Podrugović Muharem, Maglić Hasan) i predstavnike boračkih udruženja (*Ratni vojni invalidi, Porodice šehida i poginulih boraca, Jedinstvena organizacija boraca*).

Općinski načelnik je prisutne još jednom podsjetio na historijski datum 1944. godine kada je Tešanj oslobođen od fašizma, kao i na period stradanja u

posljednjem ratu 1992-1995. godina, te istakao namjere Općine Tešanj da u ok-

viru budžetskih mogućnosti u narednoj 2012. godini pomogne živim učesnicima SUBNOR-a koji nemaju nikakva primanja.



POLOŽENO CVIJEĆE NA SPOMEN OBILJEŽJA

Nakon prijema pripadnika SUBNOR-a, položeno je i cvijeće na spomen obilježja u Tešnju i Tešanjci i to na bistu narodnog heroja Huse Hođića, Centralno spomen obilježje šehidima i poginulim borcima 1992-1995. godina, Partizansko groblje u Tešnju, kao i na spomen obilježjima na Tešanjci.

Također, povodom općinskog praznika 9. septembra, delegacija Općine Tešanj obišla je Muhameda i Mehu Hrnjića iz Drinčića - žive učesnike Narodnooslobodilačkog rata 1941-1945.

Povod posjete je 9. septembar - Dan oslobođenja općine Tešanj od fašizma (1944. godine naša općina os-

lobođena je od fašizma u Drugom svjetskom ratu). Trenutno na području općine Tešanj živi 42 sudionika NOR-a.

Ovim prilikom, Općinski načelnik je Muhamedu i Mehi Hrnjiću uručio skromne hedije.



ČESTITKA U POVODU 9. SEPTEMBRA - DANA OSLOBOĐENJA OPĆINE TEŠANJ OD FAŠIZMA

U povodu općinskog praznika 9. septembra Dana oslobođenja općine Tešanj od fašizma upućujemo iskrene čestitke svim građanima naše općine u zemlji i inostranstvu, a posebno živim učesnicima Narodnooslobodilačke borbe 1941-1944.

Ponosno podsjećamo na naš historijski kontinuitet u borbi za dobro, a protiv zla. Sjećanje na 9. septembar nas prije svega podsjeća na one koji su položili svoje živote u borbi protiv fašizma tokom Narodnooslobodilačke borbe, a istovremeno i na sve one koji su položili svoj život u odbrani tokom 1992-1995. braneći Bosnu i Hercegovinu, svoju porodicu i zajedničke vrijednosti.

Općina Tešanj danas ima jasnu viziju i jasne ciljeve, ali i snagu u ljudskim i drugim resursima.

Naš put vodi ka tome da u Tešnju biti građanin bude veoma ugodno, biti investitor veoma poželjno, a biti radnik veoma zadovoljno.

Još jednom svim građanima čestitamo 9. septembar - Dan oslobođenja!

OPĆINSKI NAČELNIK
Fuad Šišić, dipl. ing. maš.

PREDSEDavajući OPĆINSKOG VIJEĆA
Esmir Subašić

POHVALE POVODOM 9. SEPTEMBRA

Povodom općinskog praznika *9. septembra - Dana oslobođenja općine Tešanj od fašizma* u Sali Općinskog vijeća Tešanj održana je i svečana dodjela *Pohvala* Općinskog načelnika zaslužnim subjektima i građanima. pohvale su dobili:



1. SUBNOR-u Tešanj - Zbog uspješne koordinacija između živih članova SUBNORA i Općine Tešanj.

2. EKO SERVIS, Tešanj - Općinska administracija u kompaniji EKO-SERVIS Tešanj ima pouzdanog partnera, a vlasnik firme Mensur Krdžalić je uspio od otpada izgraditi modernu kompaniju koja upravlja otpadom. EKO-SERVIS Tešanj je postao jedan od temeljnih mehanizama privatnog sektora na lokalnom tržištu u realizaciji vizije Općine Tešanj - Tešanj - sredina ekološke svijesti, čistoće i reda.



3. KP "RAD", Tešanj - Javno preduzeće KP "RAD" je napravilo odlučujući iskorak ka sveobuhvatnom prikupljanju krutog otpada na cijelom području općine Te-

šanj, kao i početku odvajanja različitih vrsta otpada. KP "RAD" je tokom ovogodišnjeg dužeg sušnog perioda, vanrednim naporima i ulaganjem, osigurao dodatne količine vode na vodoizvoru "Usora" i spriječio veće redukcije u potrošnji vode.

4. EKO-MLADI, Tešanj - EKO-MLADI, NVO Jablanica, Tešanj za izuzetan doprinos realizaciji vizije općine Tešanj sredina ekološke svijesti, čistoće i reda.

5. BLINKER, Kalošević - Za uspješan dugogodišnji aktivan doprinos ekološkim akcijama i uspješnim organizacijama takmičenja ribolovaca.

6. Savjet MZ Kalošević - Za uspješno prevazilaženje krize u lokalnim odnosima i uspostavljenom zajedničkom djelovanju organa mjesne uprave.

7. MADI, Bukva - Tešanj - Za učešće u izgradnji ekoparka pored regionalnog puta R - 474 na dionici Kružni tok - Krndija.

8. HIFA-OIL, Tešanj - Za poseban doprinos u sufinsanciranju uređenja grada kao i ekološkim projektima općine Tešanj.

9. Mina Ferizbegović, učenik - Za uspješno učešće u finalu svjetskog takmičenja u Holandiji u okviru reprezentacije Bosne i Hercegovine, i osvojenu bronzanu medalju.

10. Crveni križ Trogir, R. Hrvatska - Za organizovanje humanitarne akcije i dostavu lijekova Ratnoj bolnici Tešanj u junu 1992. godine.

11. Kliničko bolnički centar Split, R. Hrvatska - Za organizovanje humanitarne akcije i dostavu lijekova Ratnoj bolnici Tešanj u junu 1992. godine.

Inače, 9. septembar - Dan oslobođenja općine Tešanj od fašizma obilježava se kao općinski praznik - sjećanje na oslobođenje općine od okupatora 1944. godine i herojsku borbu naroda ovog kraja u Drugom svjetskom ratu i sve oslobodilačke težnje tokom historije općine Tešanj.

NOVI PROIZVODNO-POSLOVNI OBJEKAT KOTEKS 3

U Industrijskoj zoni Bukva je održana svečanost povodom otvorenja novog proizvodno-poslovnog objekta firme *Koteks*, vlasnika Muharema Sejdića, *Koteks 3*. Prigodnim govorom, prisutnim gostima su se obratili Izvršni direktor firme *Koteks* Haris Sejdić, predstavnik Udruženja privrednika Izudin Ahmetlić i Reis-ul-ulema u BiH Mustafa ef. Cerić, koji je proučio i dovu.

Ovom prilikom uručenu su i Zahvalnice firme *Koteks* i to firmi *INTER* Doboj Jug, *MUP-u* Kantona Sarajevo, *JP ELEKTROPRIVREDA* Sarajevo, firmi *BAJRA* Travnik, firmi *PREVENT* Visoko i firmi *NOUVA ANTILOPE* Italija.



Svečanosti su prisustvovali Općinski načelnik Fuad Šišić sa saradnicima, vijećnici u Općinskom vijeću, premijer ZDK Fikret Plevljak sa saradnicima, Reis-ul-ulema u BiH Mustafa ef. Cerić, Muftija zenički Ejub ef. Dautović, Muftija sandžački Muamer ef. Zukorlić, privrednici sa područja općine Tešanj, kao i mnogobrojni gosti iz BiH, Njemačke, Italije, Srbije i Hrvatske.

Vrijednost investicije je oko 3 miliona maraka.

HALAL CERTIFIKAT ZA FIRMU MADI

U prostorijama firme *MADI* d.o.o. Tešanj, predstavnici *Agencije za certificiranje halal kvalitete*, na čelu sa direktorom Agencije Amirom Sakićem svečano su uručili Halal certifikat vlasniku firme *MADI*, Ishaku Jabandžiću.

Na svečanosti su se prigodnim govorom, gostima obratili, u ime domaćina Edin Jabandžić, glavni imam MIZ Te-



šanj Fuad ef. Omerbašić, Općinski načelnik Fuad Šišić i Muftija zenički Ejub ef. Dautović.

Ovom prilikom, predstavnici *Agencije za certificiranje halal kvalitete* prezentirali su Agenciju i ono čime se bave, kao i važnost halal certifikata.

Inače, firma *MADI* d.o.o. Tešanj je prva firma na području općine Tešanj koja posjeduje halal certifikat.

BIZNIS, KAKO GA ZAPOČETI I KAKO ODRŽATI

U prostorijama restorana *Ukus* u Industrijskoj zoni Bukva održana je prezentacija na temu *Biznis, kako ga započeti i kako održati*. U ime domaćina, prisutnim gostima su se prigodnim govorom obratili Općinski načelnik Fuad Šišić i Sead Jahić (*IDEA-CO*).

Centralna tema predavanja je bila *Osnivač, osnivačeva kompanija i osnivačeva djeca - kako zajedno?*, koju je prezentirao Boris Vukić - jedan od osnivača *Adizes Instituta za jugoistočnu Europu* (Njegove specijalnosti su implementacija organizacione transformacije i promjena organizacione kulture u različitim granama industrije).



Edukaciji su prisustvovali Općinski načelnik sa saradnicima, predsjedavajući Općinskog vijeća Esmir Subašić, privrednici sa područja općina Tešanj i Gračanica, kao i mladi koji su uspješno

napisali Biznis plan po javnom pozivu Općine Tešanj. Inače, organizator edukacije je *Asee Adizes Institut za jugoistočnu Europu* i *IDEA-CO Consulting* u saradnji sa Općinom Tešanj.

OSPOSOBLJAVANJE

52 OSOBE

U prostorijama Federalnog zavoda za zapošljavanje u Sarajevu potpisana su dva sporazuma o saradnji.

Potpisnici Sporazuma o saradnji na implementaciji projekta Obuka i certifikacija varilaca su Federalni zavod za zapošljavanje, *USAID-Sida FIRMA projekat*, Agencija za razvoj Općine Tešanj i firma *Ćosićpromex*, a odnosi se na obuku 20 osoba sa evidencije nezaposlenih iz Tešnja, Jelaha i Usore za posao varioca.

Obuku će finansirati Zavod, *USAID-Sida FIRMA projekat* i *Ćosićpromex doo*, a odvijat će se u Mješovitoj srednjoj školi u Tešnju.

Sporazum o saradnji na implementaciji projekta Obuka i certifikacija mehatroničara su također potpisali Federalni zavod za zapošljavanje, *USAID-Sida Firma projekat*, Agencija za razvoj Općine Tešanj, ali i Općina Tešanj, te Njemačko društvo za međunarodnu saradnju (*GIZ*), a odnosi se na stručno osposobljavanje 32 kandidata za zanimanje *tehničar mehatronike*.



Načelnik Općine Tešanj Fuad Šišić izrazio je zadovoljstvo Projektom i iskazao spremnost za implementaciju sličnih projekata u budućnosti.

EKO-MLADI: CERTIFIKAT ZA LIDERE

Članovi udruženja *EKO-MLADI* dobitnici su certifikata koje je Institut za razvoj mladih *KULT* u četvrtak 15. septembra ove godine svečano dodijelio za četrdeset i četiri omladinska lidera i liderice koji su uspješno prošli obuku *Uči, misli i djeluj* (*UMiD*).

Učešće Općine Tešanj i udruženja *EKO-MLADI* u projektu *UMiD* je započelo potpisivanjem Sporazuma između Instituta za razvoj mladih *KULT* (tada pod nazivom *KULT*), općine Tešanj i udruženja *EKO-MLADI* 13. aprila 2010. godine u prostorijama Općine Tešanj.

Između ostalog, Sporazumom je bilo definisano da četiri mlade osobe sa područja općine Tešanj prođu jednogodišnji ciklus obuke / edukacije u prostorijama Instituta za razvoj mladih *KULT*.



Udruženje *EKO-MLADI* je delegiralo dvije mlade osobe: Plančić Admir (Potpredsjednik udruženja - trenutno) i Lihčić Salih (Sekretar udruženja - trenutno). Pored navedenih članova udruženja, a shodno potpisanim sporazumima između Instituta za razvoj mladih *KULT*, općine Tešanj i udruženja *EKO-MLADI* u obuku su bili uključeni i Torić Elma i Safer Grbić.

Nakon jednogodišnje obuke i položenog ispita u četvrtak (15.9.2011), između ostalih, članovima udruženja *EKO-MLADI*: Plančić Admiru i Lihčić Salihu su uručeni CERTIFIKATI kao omladinskim liderima.

Ovu priliku koristimo da čestitamo prvenstveno članovima udruženja, a naravno i svim učesnicima projekta *UMiD* na uspješnoj realizaciji.

NAJLJEPŠA DVORIŠTA ZA 2011. GODINU

Udruženje *EKO-MLADI* drugu godinu za redom realizuje projekat *Izbor najljepše uređenih dvorišta i bašta na području općine Tešanj*.

Ove godine izbor je vršen u tri kategorije: fizička lica, pravna lica i javne ustanove ili državne institucije. Na konkurs se prijavilo preko 40 kandidata u sve tri kategorije.

U kategoriji fizička lica najdvorišta za 2011 godinu, prvo mjesto osvojila je

Mehićić Mirsada i Aida, u kategoriji pravna lica najdvorišta za 2011. godinu osvojila je STR ADO VI. Bašić Hanifa, dok je u kategoriji javne ustanove najdvorišta za 2011. godinu priznanje otišlo OŠ *Mustafa Mulić* Šije.

Manifestaciju proglašenja najljepše uređenih dvorišta u sve tri kategorije, te dodjelu nagrada i priznanja za plasiranje, kao i dodjelu 27 zahvalnica za ostale učesnike organizovalo je udruženje



EKO-MLADI uz podršku Općine Tešanj.

RECIKLAŽNA OSTRVA

U cilju realizacije Strategije za dostizanje vizije: *Tešanj sredina ekološke svijesti, čistoće i reda*, Javno preduzeće RAD d.d. Tešanj, u saradnji sa Općinom Tešanj, pokrenulo je sljedeće aktivnosti:

- Proširenje obuhvata odvoza otpada na područje cijele općine (reorganizacija postojećeg sistema odvoza otpada na način da se na cijelom području uvodi jedinstveni jednosedmični odvoz);

- Uspostavljanje sistema odvojenog prikupljanja otpada uvođenjem reciklažnih ostrva (posebni kontejneri za



papir i plastiku na za to određenim lokacijama).

Trenutno je formirano ukupno šest reciklažnih ostrva (Tešanj, Jelah i Tešanjka), a u narednom periodu planira se proširenje obuhvata. Ovom aktivnošću postavljaju se temelji racionalnijeg ponašanja i iskorištenja iskoristivog otpada.

III FAZA IZGRADNJE VODOVODA DOBROPOLJE-MEKIŠ

U kabinetu Načelnika potpisan je ugovor za nastavak radova na izgradnji III faze vodovoda *Dobropolje-Mekiš*, kojom će biti obezbjeđena voda za oko 120 domaćinstava. Ugovor su, nakon provedene procedure javne nabavke, potpisali Općinski načelnik Fuad Šišić i u ime uzvođača radova, direktor JP RAD d.d. Tešanj, Izudin Alić.

"Vodovod *Dobropolje-Mekiš* je jedan od tri projekta (još i vodovodi O. Planje i Medakovo-Trepče) vodosnabdjevanja koje Općina Tešanj realizuje ove godine. Sljedeće godine je planirana završna faza izgradnje vodovoda *Dobropolje-Mekiš*", kazao je Općinski načelnik Fuad Šišić.



Završetak radova se očekuje u predviđenom roku (75 dana). Vrijednost potpisanog ugovora je oko 120.000 KM, a sredstva su obezbjedili Vlada ZDK i građani.

RECIKLAŽA OTPADNIH VODA I EMULZIJA

Firma koja se bavi proizvodnjom, sakupljanjem, sortiranjem i recikliranjem sekundarnih sirovina *EKO servis* Tešanj, nabavila je postrojenja za reciklažu otpadnih voda i emulzija, prvo na prostoru Bosne i Hercegovine.

Općinski načelnik Fuad Šišić čestitao je vlasniku firme Mensuru Krdžaliću na izuzetnim uspjesima i doprinosu ekološkoj zaštiti na području općine Tešanj, a posebno na kupljenoj opremi za reciklažu emulzije koja je bila veliki

zagađivač na području naše općine, ali i teret proizvodnim pogonima.

Firma *EKO servis* najuspješnije provodi usvojenu viziju *Tešanj sredina ekološke svijesti, čistoće i reda*, a to pokazuje broj od 5000 dobavljača. Posebno me raduje vijest o nabavci novog postrojenja, kazao je Općinski načelnik.

U narednom periodu, planiramo proširiti svoju djelatnost na cijelo područje Bosne i Hercegovine, kazao je vlasnik firme Mensur Krdžalić.



DEMINIRAN JEDAN I ODOBRENA JOŠ DVA PROJEKTA ZA DEMINIRANJE

U avgustu mjesecu završeno je deminiranje projektnog zadatka Lončari-Bašići u MZ Miljanovci-Lončari sa Liste pririteta za 2010. godinu, ukupne površine 26.566,06 m². Izvođač radova je bilo preduzeće *Tehnoelektro* iz Broda. Vrijednost projekta je 90.000 KM, a sredstva za ovaj projekat su osigurana putem *ITF-a (Međunarodnog fonda za deminiranje i pomoć žrtvama mina)* 45.000 KM i Budžeta Općine za 2010. godinu 45.000 KM

Također, Općina Tešanj je putem Službe civilne zaštite, u junu ove godine kod humanitarne organizacije *HANDICEP International* iz Sarajeva, kandidovala dva projekta za deminiranje u okviru prioriternih projekata u 2011. godini. Radi se o projektima *ID 7335 LZ Lončari-Gaj* (29.697 m²)



i *ID 7337 Lončari-Komin* (36.123 m²). Projekti su odobreni i za oba projekta općina Tešanj je sa izvođačima potpisala Sporazum, a početak deminiranja se očekuje u narednim danima.

Vrijednost oba projekta je nešto više od 250.000 KM, sa učešćem općine od 40.000 KM koliko je i izdvojeno za deminiranje u 2011. godini.

DOSTAVA PITKE VODE U UGROŽENE MJESNE ZAJEDNICE

Zbog loše hidrološke situacije i usljed nastalih problema u obezbjeđenju dovoljnih količina pitke vode Služba civilne zaštite od 20.8.2011. godine, organizovano dostavlja pitku vodu za stanovništvo mjesnih zajednica Trepče, Dobropolje-Mekiš i Tešanj (naseљeno mjesto Hrvatinovići).



Dostava se vrši putem cisterni Profesionalne vatrogasne jedinice prema utvrđenom planu.

POVEĆAN BROJ POŽARA U LJETNOM PERIODU

Prema evidenciji Službe civilne zaštite ovu godinu karakteriše povećan broj požara, naročito onih na otvorenom prostoru. I pored mnogih upozorenja upućenih stanovništvu sa ciljem adekvatnog i pravovremenog provođenja preventivnih mjera zaštite od požara do 15.9.2011. godine evidentirano je 65 požara, od čega je najveći broj na šumama i niskom rastinju. Ovome je svakako doprinio i duži sušan period sa visokim temperaturama, pa samim tim

dalje ukazuje na nepoštivanje zakonskih odredbi o provođenju preventivnih mjera u ljetnom periodu.

Služba civilne zaštite još jednom upozorava stanovništvo na dosljedno provođenje preventivnih mjera kako na otvorenom, tako i u zatvorenom prostoru, te na pravovremeno provođenje mjera čišćenja dimnjaka, kako bi se minimizirala pojava uzročnika požara na objektima u narednom periodu.



